

La Val Maighels

Manuscret en Biblioteca romontscha Mustér; M191



Denter tut las bialas e grondas alps da Tujetsch eis ei buc'ina che stat a pèr a quella da Maighels. Buca mo muort siu grondius spazi, mobein era muort la fina jarva, che crescha en quella val, eis ella preziada dils purs, principalmein da quels che han bia stiarls. Muort sia aulta situaziun da circa 2100 m.s.m vegn ei cargau en mo stiarls. Il diember ei fetg different; igl onn 1882 fuva ei cargau en 220 tgaus; igl onn 1885 mo 142, igl onn 1889 mo 113; igl onn 1891 puspei 196 tgaus. La stagiada ei fixada sin 225 tgaus, quei vul dir pli che 225 astg'ei buca vegnir cargau en.

La Val Maighels schai enasisum la Val Tujetsch da vart dalla sera e miezdi. En ina lunghezia da duas uras e mesa semein'ella gl'emprem encunter miezdi, suenter sestorscha ella encunter sera, sesalزند mo succesivamein e s'eunescha lura cun sia sora, che arriva era leu, la Val Purtgera (ni tudestg Unteralp) ord il Cantun Uri.

Per saver dar in pign maletg da quella val ston ins entscheiver odem ed ira plaunca per plaunca e gonda per gonda d'in maun en e da l'auter ora. Per saver far quei lein nus pia far ina spassegiada a Maighels.

Nus lein pia entscheiver nies viadi a Sedrun. Las quater dalla damaun ha ei num semetter sin viadi. In pulit bien pèr calzera cun rabaizas, in brav fest enferrau ei absolutamein necessari. Mo il principal ei aunc la marena, quella ei tuttavia buca d'emblidar. Paun segal, in brav toc carnpiertg e lura ina pulita talgia caschiel veder, duei esser la marena. Aschia armaus astg'ins ughegiar da far quei viadi.

Bien, giu sin il clutger da Sogn Vigeli dat ei las quater e nus passein gest ord casa per semetter sin via.

Amiez la punt entupein nus il caluster che va a tucar da stizzar. Cun in devozius: Ludaus sei Jesus Cristus, salida el nus. Nus respundin ad el: Semper segi el ludaus, e marschein frestgamein vinavon.

Traversond ils vitgs Camischolas e Zarcuns, suenter Rueras havein nus viu co ils purs eran era gia vid la lavur, ni eran sin via tier quella. A Tschamut vegn ei priu in vinars per survegnir empau comba e puspei vinavon per il stradun tochen a Surpalits. Cheu vegn ei da bandunar il stradun e traversau si il stavel da Milez e suenter haver fatg plirs carauns arriv'ins en il stavel da Tgatlems. Cheu ein ils pasters ed ils purs vid il mulscher. Las duas caschadas vaccas ein cheu tuttas serimnadas entuorn tegia, tgi stat sin peis, tgi schai, mo tuttas ein ruasseivlas e gaudan il sulegl, che sclarescha schon ualti cauld. Il paster grond porta a nus in barcagl latg grad mulschiu e quei gusta buca mal.

In'egliada sin l'ura da sac admonescha d'ira vinavon, pertgei igl ei vargau las siat. La via tochen da cheu aunc ualti emperneivla, vegn ussa mender. In schliet trutg plein crappa meina naven dalla tegia tochen en sper la tegia da Palius-dultscha (Plidutscha). Da cheu san ins ira sin pastg dil plaun en tochen en tier il mir. Il mir ei buca pli, mo il num ei restaus. Quei era ils cunfins denter las duas alps Maighels e Tgatlems, pertgei cheu entscheiva l'alp u la Val Maighels. Ussa lein nus ira empau pli plaun e mirar giu la val ch'ei cheu avon nus sco ei s'auda.

Arrivai en tier il mir stat ins tuttenina ga eri e mira si per aulta greppa, ch'ei tut anetgamein vegnida avon nos egl. La val para da haver sia fin cheu, pertgei ei sesaulza cheu greppa e pretis-crap en ina altezia da varga 100 meters e negliu ina via, in trutg d'ira vinavon. Il Badus ed il Tgiern Cavradi paran da haver dau il maun cheu in a l'auter ed aschia serrau giu la val. Nus mein suenter las preits-crap vi tochen vi tier las spundas dil Badus, cheu semeina ussa ina pintga valetta davos la greppa enasi ed en paucas minutas essan nus sisuren.



Cheu stein nus eri e mirein empau entuorn. Nus essan ussa arrivai sin in punct che porscha a nus in emperneivel aspect. Igl emprem ina egliada dalla val en, mo cheu ves'ins aunc fetg pauc dalla Val Maighels, pertgei ins ei aunc buca arrivaus sin igl ault dalla val. Ton pli imposant ei da dar ina egliada ora giu per la Val Tujetsch. Ils vitgs, ils praus e las pastiras giu bass pon ins buca ver, mobein las bialas alps dalla entira costa seniastra oragiu tochen sin igl intschess da Mustér. Cheu seporscha agl egl la biala alp da Tiarms ed il Cuolm Val. Sco in gigantic clavau da fein mira il Cuolm Val neu encunter nus. Neginas gondas e ruinas ein da veser sin siu bi vestgiu verd. A pèr cun il Cuolm Val stat ina outra alp, il Culmatsch. Cheu anflein nus bunamein mo gondas. Sulettamein giusum en ed ora ein aunc bials tocs pastiras. Dadora quella alp ei il Caschlè. Ina gronda e spaziusa alp, mo fetg schliata pastira. La davosa alp, era da quei maun ora, ei l'alp da Cuolm de Vi. Ina pintga, mo biala ed emperneivla alp. Sulettamein ils gronds darguns da Sedrun e Bugnei paran a nus sco duas grondas plagas sin quella aschi imposanta figura.


In freid suffel levanta nus ord nossa admiraziun e fa vegnir endamen che nus seigien en ina altezia da varga 200 meters sur mar e cheu eis ei era igl uost aunc empau da frestg. Las cuortas umbrivas leuvi en Val Giuv muossan era ch'ei mondi già encunter miezdi. „Bien, lein ira vinavon“, ei la parola.

In bien trutg meina nus ussa sur in pign crest vi. Cheu stat ussa avon nus in termen carpun, il Crap Ner. Sco in schendarm stat el cheu amiez la stretga val per dumandar giu a mintga passont il dazi. Ei para bunamein ch'el survegni era mintga gada enzatgei, pertgei mir'ins empau entuorn ses peis, sche ves'ins bein enqual butteglia senza tgau e bein enqual toc corda d'andutgel. Era nus dein ad el nies tribut. Suenten ina cuorta mes'ura essan già puspei en pei. Mo ussa lein nus entscheiver a mirar giu la val, essend che cheu entscheiva propi la Val Maighels. Bien, da nies maun dretg lein entscheiver. Cheu ei gl'emprem il Plaun Badus. Atgnamein mo in pign fop. Sur quel si sestendan las magras Puozas dil Badus tochen si tier lur signur, il Badus. Magras san ins numnar quellas stretgas streglias che sestorschan denter grugna e greppa siadora, pertgei ellas ein pli u meins cuvretgas cun crappa. Dadens las Puozas dil Badus ei la Plaunca ed il Grep dallas Granatas, ina liunga e lada, mo fetg carpusa plaunca. Dil plaun en giufuns sei il bia paliu, en quei aunc treis pulits lags, aschia che buna pastira eis ei mo pouca. Nus essan ussa arrivai suenter in dutg en tochen tier la crusch. Cheu sesarva avon nos egls tut ina outra val che quei che ins havess pudiu spitgar. Il Plaun la Crusch, atgnamein il plaun giusut la Plaunca dallas Granatas, consista ord pliras muotas e denter en valettas ornadas cun pastg e flurs. Nus mein vinavon ed arrivein cun paucs pass sin in auter crest.

Mo tgei ei quei. Leuvi sin quei crest mava l'aua aunc da leu oragiu ed ussa cheu va ella il cuntrari. Quei ei gleiti clar a nus, pertgei l'aua va ussa anen, perquei che la val Maighels ei unida tras ina val laterala cun la Val Curnera, aschia che las auas da Maighels serimnan tuttas, priu ora quels dutgs ch'ei odem, amiez la val per ira giun Curnera. La val ei ussa cheu fetg lada, bialas plauncas e muotas dattan ina biala survesta tochen enagiu en il stavel. Il stavel ei in dils pli bials tocs pastira ch'ins vul haver. In plaun da circa 20 minutas lunghezia e circa 5 minutas ladezia ei en ina alp ualti darar d'anflar. Odem il stavel ei la tegia. In remarcabel baghetg. Ella ei baghegiada vi encunter in crest, aschia che la part davos dalla tegia ei quasi diltut en il tratsch, la part davon ei sin in termen carpun. Aschia semeglia la tegia ina pintga fortezia. Siu tetg formeschan slondas ord igl uaul da Maighels e quei ein bravas plattas da crap. Dus scalems che negin miradur ha tagliau ora lubeschan e gidan nus sin il crap avon igl esch tegia. In'egliada sin igl esch fa endamen a nus ina tabla da scriver ord il temps dils vegls Romans. Pertgei da sum entochen dem ei igl esch plein cefras e bustabs e quei dad omisdus mauns. Cheu eis ei ina pintga cronica sur ils pasturs da varga vegn onns. Era las savas ed enqual crap sper igl esch portan numns dils pasturs.

La tegia ei pintga, bassa e stretga, mo tonaton ualti cumadeivla per ils basegns dils pasturs. La mesadad dalla tegia pren il letg en. Quel ei fetg sempels, in toc aissa giu plaun per miez la tegia formescha ina spunda dil letg, las autras spundas ein ils mirs. In brav mantun netschs (tschèrs) ed ina cozza formeschan il letg. L'otra mesadad dalla tegia survescha sco cuschina, stiva da magliar e talina da lenna. La lenna ei fetg scarta e sto vegnir purtada duas uras lunsch neutier. Amiez la tegia eis ei ina petga-lenn per tener si il tetg. Vid quella ves'ins ina enzenna da Sogn Benedetg, ina buccada palma benedida ed in guoteret aua benedida. Treis caussas che duessen muncar en negina tegia da nossas alps sursilvanas. Cura che nies egl vesa l'aua benedida e palmas benedidas si en tegia, lu vegn ei endamen, ch'era quella paupra tegia seigi in pign sanctuari per ils pasturs, cura ch'els ein la sera en tegia vid l'oraziun. Sin quei fein dorman els, suenter haver magliau ina brava pulenta cun in cup latg vitier, meglier che bein enqual hosp en in hotel suenter ina tscheina da plirs barsaus e lura aunc en in letg da plemas. Nus lein ussa bandunar la tegia e mirar giu il stavel. Il pastg en stavel ei buca liungs mo perquei eis el ton pli spess. Il proverbi da vegls pasturs, ils quals han gia pertgirau tiers en cheu ils anno 1830 secloma: Han ils stiarls da magliar treis dis en stavel igl emprem d'uost, lu han ei era aunc treis il davos uost. E quei ei buca detg da memia.

Sur il stavel si ein las Plauncas Tagliola, liungas plauncas cun bia pastg. Quellas entscheivan ora tier il Grep dallas granatas e van tochen en tier igl „avon Tagliola“. Tagliola u Val Tagliola ei ina stretga val cun teissas plauncas per part mo greppa e preits-crap, la quala ei sco in tagl che unescha la Val Maighels cun la Val Purtgera. La Tagliola auda al Cantun Uri.



Nus essan ussa arrivai tochen entadem il stavel nua che l'aua da Tagliola vegn giu da maun dretg anen. Cheu sesaulza puspei in crest avon nus, mo en paucas minutas essan nus si suren sper il Piogn Crap. Quei ei in fetg remarcabel ornament dalla natira. L'aua ha en il cuors dil temps magliau ora in vau aschia ch'il dir grep da granit formescha in ferm e segir piogn. Si suren ei la ladezia circa in miez meter, aschia ch'ins sa cumadeivlamein passar sur l'aua vi, era temps da malaura, nua che l'aua da Maighels ei gronda e furiosa. L'aua sesforza tras quei grep plirs meters e vegn lu, sesderschond sur ina preit crap giu, sco sche quei fuss sia fontauna. Enzacons pass pli anen ei il stavel dil Piogn Crap. La tegia ei ussa buca pli, mo il stavel vegn aunc duvraus enzacons dis. Sur il Piogn Crap si ein las Plauncas dil Piogn Crap. In grond spazi, mo pauca pastira, il bia ei gondas e darguns. Ina suletta plaunca ualti anen, la Plaunca liunga, ei empau pli schubra e dat in per buns solvers. Naven dil Piogn Crap san ins ira ina mes'ura tut alla grada viaden suenter l'aua, mo il bia ei grava. Ualti entadem il plaun ei aunc stavel, il Stavel dadens. Quel vegn ussa buca pli duvraus per stavel, mo il sulom d'ina tegia muossa a nus, ch'ei seigi stau cheu pli baul ina tegia. Si encunter la spunda sper quei stavel eis ei in crest, ina muota. Per quella muota entuorn ein pliras ruosnas da muntanialas e remarcabel quei crest porta il num d'in catschadur, el vegn numnaus il Crest dil Lurens. Sur quei stavel si ein las Plauncas dil Pez Purtgera. Ina gronda tenda che tonscha tochen en avon Purtgera. Pliras plauncas ein neidias e perquei empau malsegiras; principalmein la davosa spunda ei fetg dira e neidia. Tut las plauncas e crests da quei maun en ein ualti segiras ed ils tiers san ira tochen si tier la greppa senza ch'ins stuess temer ch'ei ruclassien.

En avon Purtgera cala l'Alp da Maighels si per biestga gronda, per nuorsas eis ei aunc ina tenda da biabein ina ura da quei maun viaden. Pastira eis ei mo pauca, il bia ei greppa e grava. Aschia vesa l'Alp da Maighels da maun seniester ora. Da maun dretg lein nus ussa era descriver ella sin nies retuorn anora. Mo igl emprem ha ei num da mirar suenter la marena, pertgei naven dil Crap Ner osum la

Siara tochen avon Purtgera, cun visitar la tegia ed ira a mirond entuorn, havein nus duvrau bunamein quater uras, aschia ch'igl ei ussa vargau miezdi.

Bien viadi la marena. Giu sper l'aua sin ina platta vegn priu in brav refrestg. L'aria fina dalla Val Maighels fa schon tuchegiar. Suenter haver magliau bravamein vegn ei aunc buiu in sitg aua e la sempla gasteria ei finida. Ussa lein nus aunc dar ina ruassada e lu ira vi da tschei maun ora.

Ina cuorta mes'ura ei gleiti vargada e nus stein si e semettin puspei sin via. L'ura dils pasturs leu ora ei sum igl Tgiern Cavradi e muossa cun sias umbrivas las duas. Cun in segl savein nus arrivar da l'auter maun dall'aua, pertgei l'aua ei cheu avon Purtgera buca gronda.

Da quei maun vegn ei numnau tras en ed ora la Rabetscha. In grond e bi toc pastira. Pauca greppa, bials fops, spundas e muotas tut cuvretg cun il pli bi verd. Mein nus aber cheu atras, sche vegn il patratg si en nus, mo san ins numnar quei cheu biala pastira, ch'il pastg ei aschi cuorts ed aunc aschi rars. Nus lein schar dar la risposta versai pasturs, quels dian: Cun ina capiala pleina pastg dalla Rabetscha stattan ils stiarls meglier che cun dus buns bratschs fein digl unviern. Entadem la Rabetscha dadens, quei ei la part da miez anen, ei la Plaunca verda, ina teissa, dira e malsegira plaunca. Schiglioc eis ei dapertut da quei maun segir e bien. Ils tiers astg'ins schar ira sco ei vulan. Entirs dis vegnan ils tiers catschai si cheu la damaun e negin mira suenter enzatgei entochen la sera da stavlar. Tochen ora tier il Piogn Crap ei la Rabetscha dadens. Leu sesbassa ei empauet e quei tutteninaga e la Rabetscha dadora formescha bials plauns visavi il stavel. Si encunter la greppa eis ei snueivlas gondas ch'impedeschan als tiers dad ira a malsegir. Odem la Rabetscha ein ils Fops da l'Alpetta. Cheu sesbassa la val tut anetgamein ed ina nova val sesarva, la quala unescha la Val Maighels cun la Val Curnera.

Curnera ei ina outra alp, che s'auda a privats ord la vischnaunca da Faido, Cantun Tessin. Dein nus ina egliada da quella val oragiu, sche par'ei sco sche quella val havess giu dus scaffiders. Dil maun dalla Rabetscha eis ei nuot auter che stermentusas gondas. Ei para che quellas gondas hagian vuliu far, quala hagi la pli grossa crappa, pertgei crappa da tala grossezia sco ins vesa cheu ei buca grad d'anflar dabot. Aschi amiez quella cuorta valetta, ella ei strusch ina ura liunga, ei in stavel denter duas gondas en. La Platta senumn'ei cheu. La tegia ei fetg remarcabla, essend che siu tetg consista ord ina suleta platta-crap. La tegia ei lu aunc bufatgamein gronda, aschia ch'ils pasturs san habitar en ella aunc ulti cumadeivlamein. Da l'auter maun ei la pli biala pastira ch'ins vul haver, las Plauncas dil Rotenberg vegn ei numnau.


Quella val auda mo in tochet sisum a l'alp da Maighels, igl auter s'auda tier Curnera.

Nus essan ussa arrivai tochen odem la Rabetscha ed aschia saviu mirar e contemplar l'entira Val Maighels. Ina aissa meina nus sur l'aua vi, ch'ei schon ulti gronda e nus sesanflein puspei avon tegia. La davosa purziun dalla marena vegn ussa prida neunavon e consumada si. Suenter ina pintga pausa semettein nus puspei sin via per turnar a casa. La medema via meina nus puspei ora encunter il Crap Ner e da leu a Tgatlems. Il sulegl haveva dau il davos salid al Scopi cura che nus essan arrivai sin il stradun a Surpalits.

Suenter in viadi da 9 ½ uras essan nus arrivai staunchels e nehers a casa.

Ut desint vires, tamen est laudanda voluntas.

Ils nums locals



1. **La Siara**
2. **Plaun Badus**
3. **Plaunca e Grep da**
4. **Granatas**
5. **La Crusch**
6. **Il Stavel**
7. **La tegia**
8. **Plauncas Tagliola**
9. **Pass Tagliola**
10. **Val Tagliola**
11. **Piogn Crap**
12. **Stavel Piogn Crap**
13. **Plaunca Piogn Crap**
14. **Crest dil Lurenz**
15. **Pass Maighels**
16. **Purtgera**
17. **La Rabetscha dadens**
18. **La Rabetscha dadora**
19. **L'Alpetta**
20. **La Platta**
21. **Las Plauncas dil**

Rotenberg
Il Crap ner. Quei crap senumna sunter la secunda Uia mundiala, il Crap dil schuldau. Ina tabla commemorativa regorda d'in tragic accident, nua ch'in giuven recrut ha piars la veta, tuccaus dallas ballas da ses camerats.

Indicaziuns da Stanis Berther, Sedrun